

La Trivala

Vaquí vengut Gualdo lo grand !
Tròç de fèsta, tròç de çaganh,
Baraquet de la Trivala,
De son nom Ubaldo Moyano.
Coma aquel, se'n trapa pas mai.

Repic :

Aquela Trivala !
Aquel polit quartièr !
I a que de gitanas e que de
baraquets.
An pas de sandalas, an pas de
solièrs,
Van faire la valsa, aquí jol pont vièlh.

Siás totjorn aquí per butar,
Per balhar de vam, per cantar.
Quand la vida es malaisida,
Tu lo prince de la Trivala,
As totjorn quicòm a cantar.

Repic

Aquí lo grand bolegadís
Cançon, trabalh e bramadís,
Espanhòl, Carcassés, Gitana,
Te fasián la lenga polida.
Coma aquela se'n trapa pas mai.

Repic

Novembre de setanta cinc,
Lo Franco a crebat enfin.
Gualdo e tota la Trivala,
Dins l'ostal de Monsur Lapeña
Van passar la nuèit a cantar